

শিক্ষক নিয়োগে নিবন্ধন পরীক্ষা বাতিল, সরাসরি এমসিকিউ ও ভাইভা

ইত্তেফাক ডিজিটাল রিপোর্ট

প্রকাশ : ২০ এপ্রিল ২০২৬, ১৭:০০



গ্রাফিক্স: ইত্তেফাক

বেসরকারি শিক্ষক নিয়োগ প্রক্রিয়ায় বড় পরিবর্তন আনতে যাচ্ছে বেসরকারি শিক্ষক নিবন্ধন ও প্রত্যয়ন কর্তৃপক্ষ (এনটিআরসিএ)। নতুন ব্যবস্থায় আর আগের মতো আলাদা নিবন্ধন সনদ পরীক্ষায় অংশ নিতে হবে না। এর পরিবর্তে সরাসরি নিয়োগ বিজ্ঞপ্তি প্রকাশ করা হবে, যেখানে আগ্রহী প্রার্থীরা আবেদন করতে পারবেন।

 [দৈনিক ইত্তেফাকের সর্বশেষ খবর পেতে Google News অনুসরণ করুন](#)

আবেদনকারীদের প্রথমে বহুনির্বাচনি (এমসিকিউ) পরীক্ষায় অংশ নিতে হবে। এতে উত্তীর্ণ হলে তাদের মৌখিক পরীক্ষায় ডাকা হবে। এই দুই ধাপ সফলভাবে সম্পন্ন করলেই প্রার্থীকে নিয়োগের জন্য উপযুক্ত হিসেবে বিবেচনা করা হবে।

এনটিআরসিএ চেয়ারম্যান আমিনুল ইসলাম জানিয়েছেন, এই পদ্ধতিতে প্রথমবারের মতো সরাসরি শিক্ষক নিয়োগের বিজ্ঞপ্তি দেওয়া হবে। ইতোমধ্যে বিভিন্ন শিক্ষাপ্রতিষ্ঠান থেকে শূন্যপদের তথ্য সংগ্রহ করা হয়েছে এবং তা যাচাই-বাছাই শেষে মন্ত্রণালয়ের অনুমোদনের জন্য পাঠানো হবে। অনুমোদন মিললেই বিজ্ঞপ্তি প্রকাশ করা হবে, যা শিগগিরই আসতে পারে বলে আশা করা হচ্ছে।

এনটিআরসিএ সূত্রে জানা গেছে, সারা দেশের স্কুল, কলেজ, মাদরাসা ও কারিগরি প্রতিষ্ঠানে মোট ৭৭ হাজার ৭৯৯টি পদ বর্তমানে খালি রয়েছে। যাচাই শেষে এসব পদ বিজ্ঞপ্তিতে অন্তর্ভুক্ত করা হবে।

নতুন নিয়ম অনুযায়ী, এমসিকিউ পরীক্ষা হবে ২০০ নম্বরের এবং মৌখিক পরীক্ষা হবে ২০ নম্বরের। উভয় পরীক্ষায় আলাদাভাবে কমপক্ষে ৪০ শতাংশ নম্বর পেতে হবে। চূড়ান্তভাবে নির্বাচিত প্রার্থীদের এনটিআরসিএ থেকে নিয়োগের জন্য সনদ দেওয়া হবে।

বর্তমানে দেশে ৩৪ হাজার ১২৯টি বেসরকারি শিক্ষাপ্রতিষ্ঠানে প্রায় ৫ লাখ ৯৮ হাজার শিক্ষক এবং ২ লাখ ৬ হাজারের বেশি কর্মচারী কর্মরত আছেন।